



Sabtu, 18 Pebruari 2023
Ogen: Kejadin 16:1-3



Maksaken Sura-sura



Piga tahun nge semalna kalak sabar ertima? Subuk nimai janji si enggo ibelasken guna erjabu, entah nimai tuah i bas perjabun. Adi enggo ndekahsa pudun janji e lenga isehi megati nina kalak 'la lah e bagi nimai buah parimbang, timai buahna erbunga pe kepe lahang,' etina la lit si man arapen.

Enggo 75 tahun umur Abram tupung ia nadingken kutana Haran ngikutken persuruhan Tuhan. Ope denga ia berkat, enggo erpadan Tuhan man bana maka sinursurna pagi bagi kersik i tepi lawit entahpe bagi bintang i datas langit teremna. Padan e icikep Abraham enteguh, janah padan Dibata e me asamna berkat nadingken kutana. Keca 10 tahun i Kanaan, tanda-tanda guna jumpa tuah la lit i bas Sara. Umur reh tuana, gelah dat sinursur ndai lenga teridah. Sepuluh tahun nimai padan si enggo pernah ibelasken Tuhan e labo paksa si kentisik. Rikutken umur reh metuana, aru ate Sara di kune la lit sinursurna, ise pagi si nerusken garis keturunan Abraham. Aru atena e rikutken umurna si enggo metua, lanai akapna mungkin ia banci mupusken sekalak anak man perbulangenna.

Kearun ate la mungkin nari mupus ras ketedehen ate ndatken sinursur erbahansa Sara nuruh Abraham muat Hagar budakna jadi ndeharana. I bas aru ate e lit i je pengertin ragu nandangi janji Tuhan. Terdauhen la tek nandangi kai si enggo pernah ibelasken Tuhan. Sipelueluken la lit pengarapen. Pas bagi kuan-kuan kalak karo ndai bagi nimai buah parimbang. Katedehen ate ndatken sinursur e enggo engkuasi perukuren Sara. E maka ibahanna usahana sendiri, lanai ia arih-arih ras perbulangenna. Mis saja isuruhna bagi sura-surana ngempoi Hagar. Lanai lit pertimbangan salah benar adi ngempoi budak. Pokokna seh sura-sura gelah dat sinursur.

Megati i bas nehi sura-sura, kita pe lanai erpersukuten man Tuhan, lanai arih ras perbulangen. Adi enggo si akap payo, e naring maka banci idalanken. La si siksiki maka sura-sura e banci enggo nalahi i bas aturen Tuhan.

☞ I bas muat keputusan perlu arih ras erpersukuten man Tuhan